



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tiryimyim@aolima



tir yimyim

TAPAK 10

Assam CM inyaksü atema Himanta shimogo

Aryna Sabalenka-i Madrid Open kokogo

VOL. XVIII NO. 205 (ADOK 205) DIMAPUR TENTONÜ (MONDAY) MONUPII (MAY) 10, 2021 ₹ 5.00

## Manipur aser Assam nung COVID ajanga nisung 60 asü

**Imphal/Guwahati, May 9, 2021 (Agencies):** Manipur aser Assam nung tesüiba ghonda 24 tsungda COVID-19 ajanga nisung 60 süogo.

Manipur nung tetsür 7 dena nisung 12 asü aser parnok züngsema tasür ajak agi 461 kümogo.

Manipur nung Central Armed Police Force (CAPF) sepai 2 densema nisung 442 dak COVID-19 aliba putetogo, ta state health department-i metetdaksü. Manipur nung tang tashi nung nisung 34,775 dak COVID-19 putetogo aser tang parnok 3851 anepaludar.

Tesüiba ghonda 24 tsungda asürtemji Kangpokpi, Ukhrul, Imphal East, Thoubal aser

Imphal West district tem nungi liasü.

Imphal West (168), Imphal East (140), Thoubal (17), Bishnupur (27), Kakching (32), Ukhrul (13), Churachandpur (15), Chandel (5), Senapati (3), Kangpokpi (1), Jiribam (4), Noney (12) and three each from Senapati and Tengnoupal are among the newly infected civilians.

Külen, Assam nunga tesüiba ghonda 24 tsungda nisung 48 asüba osang metetdaksüogo.

Tesüiba ghonda 24 tsungda nisung 3,299 dak Covid19 aliba putetogo, ta Deobar nikongdang NHM-i metetdaksü.

Assam nung tang nisung 36,005 anepaludar.

## Tanur nem Covaxin agütsütsü tiyazü osang prokshir: Centre



osang ka prokshibaji tiyazü ta Deobarnü Centre-i metetdaksüogo.

India nung COVID-19 anema amshiba vaccine tem rongnung Covaxin dena lir.

"Arishi küm 12 ser tempur

**New Delhi, May 9, 2021 (Agencies):**

Tanur arishi küm 12 ser tempur dak Bharat Biotech-i yangluba Covaxin agütsütsü sorkari agizükogo ta

dak Bharat Biotech indang vaccine, Covaxin amshitsü melaogo ta tweet kati shiogo. Iba osangji tiyazü lir. India sorkari iba ama temelaba kecha magütsü. Arishi küm 18 ser tempurtemi dang tang COVID-19 agütsütsü agitettsü" ta Press Information Bureau (PIB)-i metetdaksü.

Covaxin ya Hyderabad nung amenoka aliba Bharat Biotech-i Indian Council of Medical Research (ICMR) aser National Institute of Virology (NIV) den yaritepa yanglur.

Covaxin dak alia India nung ano vaccine ana- Covishield aser Sputnik V amshitsü temelaba agüja lir.

## Covid-19 aketertem dak 'Black Fungus' adokba temetettsütem

**New Delhi, May 9, 2021 (Agencies):** COVID-19 nungi taneptsü angurtem dak mucormycosis mesüra 'black fungus' tashidak adoker aser iba atema Deobarnü Centre sorkari temetettsü kar metetdaksüogo.

Iba tashidak ya junga anepalu mesüra tamajungba akümtsü. Mucormycosis ya fungal infection ka lir aser iba yagi mozü tagidakpurtem dak kongshir, ta Centre-i ashi.

"Mopung nungi fungal spores asüketba sülen sinus mesüra tepokpok nung kongshir," ta Union Health Ministry aser Indian Council of Medical Research (ICMR) ajanga metetdaksü.

**'BLACK FUNGUS' AJANGA TSÜNGLANGLENAGÜJA ALIBAYIMYATEM SAYUA TASHIDAK TULU KÜMDAKTSÜR:**

- Tenük aser teni temeket nung tashitsü atur aser awaker.
- Temang metaa shiranger
- Tekolak angor
- Aketer

- Tango junga mesashiteter.
- Azü saksüteter.
- Tekolak meshidaki akümer.

### TEKÜMDANGTSÜ:

- Temang nung timtemba mesüra shirangba atema zübazüba malitsüla.
- Teni tangbanger kangshiba ajak bacterial sinusitis ajanga lir ta mebilemtsüla.

### TENOKDANGTSÜTEM:

- Auyi kanga alidak mask enokang.
- Ali, mol mesür akoko amala amshidang tsüngsem, longpant, tola talang aser gloves enokang.
- Scrub bath dena temang merüka yuang.

**COVID-19 AGI SHIRANGERTEM, DIABETESALIRTEM MESÜRA IMMUNOSUPPRESSED NISUNGTEM DAK IBA TASHIDAK ADOKBA YIMYATEM:**

- Sinusitis - teni tangbangtsü, teni nungi nep tanak mesüra

## COVID-19 Nagaland: Nisung 237 dak putet; 3 asü

**Kohima, May 9, 2021 (TYO):** Deobarnü Nagaland nung nisung 237 dak COVID-19 aliba putetogo aser parnok züngsema nisung ajak agi 16,150 kümogo.

"Tanü nisung 237 dak COVID-19 putet. Parnokji Kohima nung 128, Dimapur nung 89, Mon nung 5, Tuensang nung 4, Phek, Mokochung & Longleng nung asemsem (3) aser Peren nung 2 lir" ta Health & Family Welfare Minister, S Pangnyu Phom-i metetdaksü.

"Maneni, tanü nisung 128 taneptsü nguogo. Parnokji Kohima nung 86, Dimapur nung 37, Mon nung 4 aser Mokochung nung 1 lir" ta paisa ashi.

Nisung 16,150 rongnungi 12,687 taneptsü nguogo aser tang 2,809 anepaludar, ta Minister Pangnyu-isa shisem.

"Nagaland nung COVID-19

nungi taneptsü angur 78.92% dang kümogo," ta State Nodal Officer, IDSP, Dr Nyanthung Kikon-ia ashi.

Tang shirangertem rongnung parnok 131 dak shirangba yimya terara lir, 48 tera shiranga oxygen agütsür, 78 kanga mejungi shiranga oxygen agütsüdar, ICU nung 11 aser 8 ventilator nung lir, ta paisa metetdaksü.

"Deobarnü COVID-19 puteta alir nisung 3 tashi asü. Parnokji Dimapur nung 2 aser Mokochung nung 1 liasü. Tanü asürtem züngsema tasür ajak agi 140 kümogo saka parnok 10 bo tanga timtem ajanga asü," ta Dr Kikon-isa ashi.

Nagaland nung COVID-19 aliba puteter nisung 514 tashi tanga state temi ogo, ta paisa shisem.

"Nagaland nung COVID-19

alitsü akok ta temolung melemi bilemba sample 1,65,028 tendangogo. RT-PCR ajanga 81,603, TrueNat ajanga 50,363 aser Rapid Antigen Test ajanga 33,062 tendang" ta Dr Kikon-isa ashi.

Deobar tashi nung Nagaland nung nisung 1,77,113 nem COVID-19 vaccine indang dose 2,25,361 agütsüogo, ta State Immunization Officer Dr Ritu Thurr-ia metetdaksü.

Vaccine agirtem rongnung frontline workers 51,690, healthcare workers 14,992 aser arishi küm 45 ser tempur 1,10,431 lir, ta paisa ashi.

Parnok rongnung nisung 48,428-i vaccine indang dose anaprong agiogo. Parnokji frontline workers 26,485, healthcare workers 9,971 aser arishi küm 45 ser tempur 11,792 lir, ta Dr Thurr-isa metetdaksü.

## Assam nung Himanta Sarma-i CM inyaksü; Governor den ajurutep

**Guwahati, May 9, 2021 (Agencies):** Deobarnü Union Agriculture Minister aser Assam atema BJP election in-charge, Narendra Singh Tomar-i Assam nung Chief Minister inyaksü atema Himanta Biswa Sarma shimba osang metetdaksü.

Iba osang sangoktsüba sülen Deobar anüngdang Himanta Biswa Sarma aser Sarbananda Sonowal nati Assam Governor Jagdish Mukhi den ajurutep aser sorkar akümtsü atema temelaba meshiogo.



AGP president Atul Bora aser UPPL president Pramod Boro nati anir NDA den yaritepba teloktem nungi lennirtemi Raj Bhawan nung Governor den ajurutep.

Deobarnep Sarbananda Sonowal-i Governor Jagdish Mukhi nem Chief Minister nungi aneba shidi agüja liasü aser iba ajanga Himanta Biswa Sarma-i Chief Minister inyaksü lenmang lapoktsü.

Hombarnü Himanta Biswa Sarma-i aniba Assam Cabinet-i tezüngzüktep agütsü.

Northeast nung BJP lennir Himanta Biswa Sarma-i May 9, 2021 nü Assam nung Chief Minister inyaksü atema tezüngzüktep agütsü.

Iba sentong ya Hombar anüngdang 12:00 ako nung Srimanta Sankardev Kalakshetra, Guwahati nung agütsü.

Sarma den külemi Assam nung MLA aika cabinet minister ama tezüngzüktep agütsü.

Sarma-i Home, Finance aser Health mapatem maneni ketdangtsü ta osang angazüker.

BJP den yaritepertem- AGP aser UPPL teloktemia Himanta Sarma-i Assam chief minister inyaksüba molunga agizükogo. Srimanta Sankardev Kalakshetra nung asüng sentong

agütsü atema renemdar aser Kamrup-Metro district administration-i iba sentong nung SOP aser COVID-19 teinyaktsü ajak shitak inyaksü atema mapa inyakdar ta Kamrup-Metro DC Biswajit Pegu-i metetdaksü.

Assam DGP Bhaskar Jyoti Mahanta-ia Deobarnü Srimanta Sankardev Kalakshetra semdangogo aser security maparen reprangshimogo.

Himanta Biswa Sarma-i 1990s mapang Congress nung aden. 2001 küm pai Congress ticket amer Jalukbari Assembly constituency nungi MLA aküim. Iba sülen 2006 aser 2011 election tem nunga pai takok angu.

Assam nung Congress sorkar yimsü asüadang Himanta-i Agriculture, Planning & Development, Finance, Health, Education mapatem inyakogo.

Lok Sabha election nung Congress-i tamakok anguba sülen Himanta-i Assam nung Tarun Gogoi lenisüba anema noktak.

Iba mapang Sonia Gandhi aser asür Ahmed Patel nati Himanta dang Assam nung pa taruba Chief Minister inyakdaksütsü ta nangzüker. Ajsüiaka, Rahul Gandhi-i ibaji memolungba ajanga Himanta-i Congress toktsür Bharatiya Janata Party nung aden.

Link - [https://www.ijmr.org.in/temp/IndianJMedRes1392195-397834\\_110303.pdf](https://www.ijmr.org.in/temp/IndianJMedRes1392195-397834_110303.pdf)



### 24th Angetyongpang AC, Independent Party ajanga jangjashitsür

**Dimapur, Monupii/May 09 (TYO):** Naga Solidarity Park, Kohima nung tawa 29 Buba NSF enti mungdang amungdang Minister Tongpang Ozukum-i 'Naga nung kisung melitetsü' ta ashiba o junga mangateti NPCC tir K Therie-i May 1, 2021 osangkaket nung adoktsüba ya tongmelang agi jangjashitsüner, ta 24th Angetyongpang Assembly Constituency nungi Independent Party indang office ajanga sangdong ka nung ashi.

Iba telangzüba agütsüba ya ajanga pai aginüba ama nüburtemi tali metettsü, saka pa ama lenir tain ka mangmanga alidang, jangjashitsütsü tim ta bilemer, ta 24th Angetyongpang AC nung Independent Party tir, Nungshimangyang aser tongti zulur, Repachuba nati sangdong

nung ashi  
Nisung meimchirtemi kija melitetba ama, asenok Naga nungera nübur kaka ama mesüra 'entity' ka ama azüngmeyaka, dangar nungi pila mesüra balaka melitet. Iba olen ji Minister-i mungdang nung ashiba lir. NPCC tir komaser mangmanger mesüra masüba ka angateta mangmangtsüsa akumar onoki memetet, ta sandong ajanga ashi.

Akhi mapang Naga nunger yimdaklirtem dangar dak memetaloki lia aruba otsü lir, aser achi ochi, saka nüburtem tesem balala nung renloka aoba mapang tempa-tinu yanglu, danga yimtsüngtem den tesendaktep tajungba akum, tangatetep aser amalitepa ao. Yamaji masüna? ta sangdong nung shia lir.

"Iba lima nung tashi tait linüktema telok ka ama lungiemer inyaksü meranger asünung, pai (K Therie) asenok Naga nunger ya akhi yimya dangi meyipa oa müketa alir shinga dena tesendaktep meyaglui aleper alitsüla, ta ashir asü?" ta asüngdang.

Yangi onoki telangzüba menüngdak, kechiaser nisung ka tebilemba nung onoki obendang magütsür, ta sangdong ajanga ashi.

Asen otsüla-oboula nungeri par taküm aser rongsen agütsüba nungi süngjang atangba agitsü Tongpang Ozukum dak malang, ta K Therie-i ashiba atema shibai kechi langa aliar Tsüngremi bendangangma, kechiaser Tsüngremi tajungba meteta lir aser ajak atema tajung inyaker, ta sangdong ajangasa ashi.

### PTPF-i nisung purtem aitsür

**Kohima, May 9, 2021 (TYO):** Phek jila April 26 nü Madhucon Project Ltd nung mapa inyaker ka pur aoer Vevolhu Khusoh aser Mutuku Vero na apuba atema DEF Phek nem tenüngsang agütsür, ta Phek Town Public Forum (PTPF)-i metetdaksüogo.


"Sen yong nisung pur aoba ya Naga sobaliba nung maliba inyakyim ka lir aser asen loktiliba nung iba mapa meinyakdaksütsü," ta PTPF president Khosapa Venuh

asere general secretary Seyieveto Lohe nati sangdong ka nung ashi.

Iba inyakyim khukhua aitsür aser ozüng amertemi ozüng tapet agi aibelenertem merenshitsü mepishir, ta PTPF-isa ashi.

Phek nung ozüng alema mapa inyakba azüoktsü atema merangba aser COVID-19 wara anema inyakba nung onoki akokba tashi yariteptsü, ta parnokisa metetdaksüogo.

### Anangmen Sector Block-I ajanga pelaba lemsateper



**Dimapur, Monupii/May 09 (TYO):** Sungkomen Ward Mokochung nungi Anangmen Sector Block-I leni aoba lenmang yanglutsü asoshi ali kibur shirnokisa molungsoa ali tenlaogo, aser lenmang yangluba nung kiyonger anogo 18 tashi angati nübu tenlaogo, iba den lokti, Arogo aser kija kibong kwikati rongsen, nübu aser shisatsü ajanga temeim

lemsatepogo, nenok ajak dang Anangmen Sector Block-I ajungai kangasa pelaba lemsateper, ta sangdong ka ajanga ashi.

Nenok mapa tajung aser temeim onoki kodanga mamatsü. Asen teyanglur Tsüngremi nenok lokti, kibong maneni moajang ta ozü sarasatem, ta sandong ajangasa ashi.

### Tashiyim amshia senotsü meshir nisung ana Kohima Police-i apu



**Dimapur, Monupii/May 09 (TYO):** Mejangjaba nisung ana linük tenzüker tenüng amer Upper Chandmari Colony, Kohima nung alir ki ka nungi tashiyim amshia senotsü meshir ta May 6, 2021 nikongdang 4:50 ako meta osang tejangja ka

angazükba nung ajemdaker Kohima Police ajanga iba ki ya lungbanga liasü. Aji süaka police marudang mejangjaba nisung ana ya iba tesem ya yutsür orr liasü, ta sangdong ka ajanga ashi.

Mejangjaba nisung ana

tereprangtsü jangjaba sülen police temi tena tsüngsü pua ao aser Midland Colony nung pua liasü.

Pua alisang nisung ana ya PO/PS Tseminyu kübok Sendenyu yimtsüng nungi Zelhoulie Thong'er jabaso tang Merhülitsa, Kohima nung telidak arishi küm 21 tain Shakulo Thong aser PO/PS Khuzama kübok Phesama yimtsüng nungi Asür Vitsonyü Kuotsu'er jabaso tang Middle Midland Colony, Kohima nung telidak arishi küm 27 tain Yaliezo Kuotsu, ta jangjatetogo.

Iba dak sendakba nung ken o ka IPC indang Section 384/34/448 kübok benoka bushisüngdang maparen tenzükogo, ta sangdong ajanga ashi.

### Tening SDTF senden menogo

**Dimapur, Monupii/May 9 (TYO):** Covid-19, Tening Sub-Divisional Task Force (SDTF) senden May 7 nü Town Hall, Tening nung menogo. Iba senden nung Arogo balala nungi Pastor tem aser Tening jila GB tem dena liasü.

Iba senden ya Additional Deputy Commissioner Tening, Rhosietho Nguori (NCS) lenisüba nung agi, shiba Sub-Divisional Task Force Tening mendenbuba lir. Senden nung pai Sub-division tensa indang metetdaksü aser sorkari agütsüba SOP's indang lemsatep.

Onük balala benoka sensak asema sülen teküboklen agüja aliba onüktem lemtet:

1. Tening jila nung tekülem sentep anena atatsü: Nüburtem kümzüka toktsütsü atema May 16 nü tashi Tening jila nung tekülem sentep ajak shibanga atatsü aser May 16 sülen maneni asadangshitsü.

2. Asüpila sentong: Tening jila nung asüpila sentong ajak SOP dak ajemdaker agitsü. Asüpila sentongtem ajak mangyima aliba kibongtem den

tamangba yimsü lenirtem aser Administration o Police-i renemtsü.

3. Kiyomba/Birthday benjung: Kiyimba aser birthday benjung amala ayongzüka agitsü atema jelia ADC Office Tening nungi tezüluba nung temelaba meshitsüla, aser benjung amungba mapa tetuyuba sülen anidaksüla.

4. Tening jila nung covid agi shirangertem lokti nungi pila alitsüba: Covid agi shirangertem nem pei kidang temang anepalutsü atema tenüngdakba facility tem magütsütetra GHS Tening building nung mungdaksütsü. Iba dak sendakba nung shiranger kinungertemi chiyongtsü, bedding aser tanga tenüngdakba osettem agütsütsüla.

5. Bank nung inyakyim: Bank nung nisung tali nongtepba police-i achayangtsü.

6. Dokan ajak nung Hand wash/ Sanitizer ayutsü: Hand wash/Sanitizer amshitsü asoshi tokja maliba ngutetra item dokan ajak osang kecha magütsü shibangtsütsü.

### Zunheboto nung World Red Cross Day amung



May 8 nü Deputy Commissioner conference hall nung Indian Red Cross Society, Zunheboto Branch-i World Red Cross Day ayongzüka amungba mapang tangokba noksa nung angur.

**Dimapur, Monupii/May 9 (TYO):** Alima ajunga den jangyu medema Indian Red Cross Society, Zunheboto Branch-i, May 8 nü Jean Henry Dunant asoba anogo World Red Cross Day ayongzüka mungogo. Iba sentong ya 'wear mask to protect yourself and others and stop the spread of COVID-19' omen nung ajemdaker Deputy Commissioner indang conference hall nung agia liasü.

Sentong ajak Covid-19 dak sendakba nung tetuyuba agütsür aliba sülen anidaka agiogo.

Lokti pelaa agizükba o jembiba mapang Hony Secy, Dr Hokishe Kiho-i, IRCS Zunheboto branch inyakyimtem metetdaksü, kong wara pokteter aliba ajanga tanga state nungi meyipa arurtem nem teyari agütsüba, anentsü lendong agi kongshir aliba kibongtem nem

teyari agütsüba aser alimar yimya agi lendong bener arutsüba agi kongshir aliba yimtsüngtem semdangba mapang osettsüt balala agütsüba densema lir.

Deputy Commissioner aser IRCS, Zunheboto branch mendenbuba Peter Lichamo-i, alima ajunga nung Red Cross Society temi teyari balala agütsüba ya tenüng asangtsü langa lir,

(Maneni tapak 9 nung...)

### Mon nung ULFA (I) züngsem ka temai adok

**Dimapur, Monupii/May 09 (TYO):** IGAR (North) indang Spear Corps kübok Tuensang Battalion ajanga telung nung alirtem temai adoktsü atema mesüzüksü merangba nung takok tulu ngua, Mon district kübok Indo-Myanmar arrtsü nung ULFA (I) züngsem ka Myanmar nungi meyipa shilangba mapang Border Domination Patrol matsüngdang

bendanga agüja liasü.

Pa temai adokba ajanga region nung dangartema temai adoktsü ajungmesotsü. Paise ONGC nung inyaker Ritul Saikia pua bener aoba ya ULFA (I) kabu nung lir, ta ashi.

Pa ULFA nung aliba mapang timtema aliba indang ashi aser külem züngsemtem dang azüdokshi yutsür temai adoktsü ayongzüka liasü.



# Assam CM inyaktsü atema Himanta shimogo



Deobar anüngdang BJP lennirtem Himanta Biswa Sarma aser Sarbananda Sonowal nati anir MLA temi Assam Governor Jagdish Mukhi den ajurutepdang agiba noksa angur.

**Guwahati, May 9, 2021**

**(Agencies):** Mapang tatsüka osang mejangjatei aruba sülen Deobarnü Assam nung chief minister inyaktsü atema BJP lennir Himanta Biswa Sarma shimba osang metetdaksüogo.

Sarma ya Amit Shah den yariteper tajung ka lir aser pai tang teinyakdak CM Sarbananda Sonowal melenzüktsü.

Union Agriculture Minister aser Assam atema BJP election in-charge, Narendra Singh Tomar-i iba osang metetdaksü.

BJP legislature party senden nung arishi küm 52 tain Sarma tekolak ama shimba sülen, Tomar nem party indang observer maparen nungloktsü.

MLA tasentem shimba indang senden nung CM teinyakdak alisang Sarbananda Sonowal ajanga CM atema Sarma tenüng agüja liasü.

Honibarnü New Delhi nung Sarma aser Sonowal na den BJP president JP Nadda aser

home minister Amit Shah densema Assam finance minister Sarma chief minister ama shimtsü asoshi mapang agia olemtepa liasü.

Sarma ya Northeast nung BJP party indang election strategist ka lir. Pa ya Amit Shah den tesendaktep tajung lir. Külén, Sonowal-ia Prime Minister Narendra Modi den tesendaktep tajung lir.

Sarma ya Jalukbari menden nungi takok angu. Pai Congress toktsür 2015 küm BJP nung aden.

Tang Assam state nung Sarma-i Finance, PWD, Health & Education portfolio mapatem bena lir.

Kanga dang sashia toktepba Assam Assembly election nung BJP teloki anir maparen achayangtsü atema Sarma nem maparen nunglokja liasü.

2019 küm Assam nung nüburtemi CAA anema shia lungkak aitba sülen Assam nung BJP teloki tanaben yimsü asütsü atema timtem ajangshia

aruogo.

State nung sorkar tasen tenzüktsü atema lenmang lapokja Deobarnü arishi küm 59 tain Sonowal-i pa mapa nungi anenba shidi Assam Governor Jagdish Mukhi nem agütsü.

Assam nung tang teinyakdak chief minister Sarbananda Sonowal aser pa kübok tenzüka arur council of minister temi State nung Sorkar tasen kümtettsü asoshi lenmang lapokja parnok ajak mapa nungi anenogo.

"Chief Minister Sonowal aser pa den külemi inyaker council of minister ajaki Assam Governor Jagdish Mukhi nem parnok indang resignation agütsüogo aser itemji Governor-i agizük" ta Raj Bhavan sangdong ka nung metetdaksü. Züngsem 126 state Assembly nung BJP-i menden 60 nung takok angu. Parnok den yariteper AGP-i menden 9 aser UPPL-i menden 6 nung takok ngua liasü.

# Guwahati nung COVID-19 ajanga asürtem rongdoktsü atema tesem 7 agütsüsemer

**Guwahati, May 9, 2021**

**(Agencies):** Assam sorkari Guwahati nung COVID-19 agi shiranga asürtem mang rongdoktsü atema cremation site 7 talila lemezüktsüogo.

COVID-19 agi asürtem mang rongdoktsü tesemtemji: Ulubari Electrical Crematorium, Basistha Cremation Ground, Bogthuli Cremation Ground in Panjabari, Jalukbari Cremation Ground, Garigaon Kabarsthan, Jalukbari Kabarsthan, aser Katahbari Kabarsthan lir.

Taoba mapang Guwahati nung COVID-19 agi asürtem rongdokdak tesem pezü dang lir. Itemji Ulubari Cremation ground, Bhoonath Cremation

ground, Athgaon Kabarsthan aser Islampur Kabarsthan lir. Guwahati nung nisung kanga asüba atema sorkari mang rongdokdak talila agütsütsüsa aküm.

Honibarnü Assam nung COVID-19 agi shiranger nisung 50 tashi asü.

Tasürtem rongnung parnok 16 tashi Guwahati yimti nung liasü.

Tang tashi nung Assam nung COVID-19 agi shiranga asür nisung 1628 kümogo.

Maneni, Honibarnü Assam nung nisung 5756 dak COVID-19 aliba puteta liasü.

Nisung 5756 rongnungi parnok 1543 tashi Guwahati aser temeket nungi lir.



Assam kübok Kaziranga National Park nung police-i shikarir asem apuba noksa nung angur. Parnok ya Karbi Anglong nungi Welson Teron (34) aser Dereshang Rengma (36) aser Dimapur, Nagaland nungi Alo Rengma (29) nungertem lir ta jangjaogo. Karbi Anglong Police-i parnok ket nungi AK series rifle ana dena prangpong-injang aika ngutetogo. (Diphu, May 9)

# Tripura nung BSF-i nashi 24 apu



**Agartala, May 9, 2021**

**(Agencies):** Eid benjungmung atongtsü lia arrtsü adena ozüing alema inyakba maparen nokdangtsü atema Tripura Frontier indang 74 Bn BSF-i Indo-Bangladesh arrtsü mitba mapang nashi 24 apu.

Osang tejangja ka angazükba nung ajemdaker BSF sepai team kati Honibar aser Deobar tsüngda aonung meta Sepahijala district nung Kamalagar police station kübok Kamthana border out-

post nungi nashi telok ka den motorcycle apu, ta BSF ketdangsür kati ashi.

"BJP yimsüsüba menden tongtettsüsa vote ngura, ghonda 24 tsüngda nashi shibelenba maparen anentsütsü," ta West Bengal Assembly election 2021 nung BJP teloki kanga tongtipang süa jembiogo.

Election magidang West Bengal nung Indo-Bangla arrtsülen nashi shibelenba maparen nokdangtsü

nükjidong nung ita ishika atema central armed forces tem kanga dang jeretpera mit aser iba mapang arrtsü adena nashi shibelenba maparen ajema aküm.

Eid benjungmung matongdang, Muslim kin indang festival tulutiba atema Bangladesh nung India nungi nashi ahangba timba kümogo.

Ajasünung, arrtsü adena nashi shibelenba atema North-east India nung Assam aser Tripura ya tongtibang tesem kümogo.

Ozüng alema nashi shibelenertemi BSF indang second-in-command, Dipak Mondal tepsetba sülen, BSF teloki kanga sashia mit asünung, nashi shibelenba maparen ajema aküm.

Ajisüaka, tesüiba ita ishika West Bengal election mapang, arrtsü adena nashi shibelenba maparen tali kümadak.

"Yasüng 74 Bn BSF-i sen 5,17,048 alang motorcycle 2, nashi 24 aser tanga osettem apu," ta commandant-i ashi.

# Nisung 244 dak COVID-19 tashidak putet

**Itanagar, May 9, 2021**

**(Agencies):** Arunachal Pradesh nung nisung 244 dak COVID-19 aliba putet.

State nung iba tashidak adoker külen nungi anogo ka nung nisung 244 dak putetba ya timtiba alitsü.

COVID-19 aliba puteter züngsema state nung nisung ajak agi 20,046 kümogo.

Itanagar Capital Region nung tashidak puteter timtiba liasü. Iba yimti nung nisung 77 dak COVID-19 putet.

Covid-19 putetba tanga district temji Tawang - 33, Lower Dibang Valley and Lohit - 20 each, Changlang - 19, Lower Siang - 13, East Siang - 12 aser Lower Subansiri - 10 lir, ta Deobarnü Arunachal Pradesh

State Surveillance Officer, Dr Lobsang Jampa-i metetdaksü.

Tashidak tasen puteter rongnung CRPF sepai 4 aser army jawan ka dena lir.

Rapid Antigen test ajanga nisung 211, RT-PCR test ajanga 17 aser True Nat ajanga nisung 16 dak iba tashidak aliba tendangtet.

Parnok rongnung (tashidak puteter 244) nisung 96 shi iba tashidak temaitsü agi shirangdar aser tanüngba dak iba wara temaitsü agi shirangba mali. Ano külen, Honibarnü State nung nisung 135 shi iba tashidak nungi taneptsü nguogo.

Tang Arunachal Pradesh nung iba wara agi taneptsü angur 17,984 shi kümogo.





## TIR YIMYIM YIMOBILEM (EDITORIAL)

DIMAPUR TENTONÜ, MONUPII (MAY) 10, 2021

### Mozü kidang inyaktertem yaritsüla

**T**ang ama alima ajak ayimsünga, nokdangaka menokdangtet, tashidak wara aoba mapang yabo mozü kidang inyaktertemiang shirangertem yaritsüba masü saka meshirangertemia mozü kidang inyaktertem yaritsü kanga rongdak nungdaka kümogo. Covid-19 tashidak wara ama ya yimbazüa bilemetsüba tashidak masü, khen mekümdanger asü dang manger sangwa nung asenok tango tangadoktsü. Yaküm küm mezü ng asen lima tashi iba tashidak wara mesen agi tonga arudang, asenok tebilemetsüji bendanglen nungi arur asenok kinunger adianutem anogo ter pezünü tesem balaka nung quarantine süa ayutsüba mapa liasü. Iba mapang asenok nübertemia government den yaritepa inyakba agi tashidak wara takok ngua nokdangtetogo. Ajisüaka, ano tzüim nung tanaben yipru tesashi arua tzüsem nungteta adok ama, tangsa tesashiba küma kasa tashidak agi asen lima kangshidagi. Joko, tang yabo yaküm küm ama bendanglen nungi arurtem quarantine nung ayutsüba tebilemetsü masü saka mozü kidang shirangertem asoshi yipten aser oxygen peria alitsü nungdakba tebilemetsü agi tonga lir. Tia junga asen lima nungbo tang tashi shirangertem yipten agi makuba mesüra oxygen agi anünga timtembo mali, saka India tesem aika nung mozü kidang yipten agimadokba aser yipten aliyonga oxygen maliba agi shirangertem repranga lia südaksüba, temulung ashitsü, otsü aika atalokdagi. Itemji government-i dang masü saka nübertemia dena pei teinyaktsü meinyaki tangar dak dang imlaba ajanga atalokba timtemtem lir. Aji oda, tamasa quarantine center agi timatem aser tang yipten aser oxygen agi timatemer, iba sülen asenoki meyarisemra, tang anema alirtem asenok shirangdangbo mozü kidang inyaker doctor aser nurse-tem agi anüngtsü. Iba tensa tiaji, matalokia ataloktsü ama bilema asenok nukla nung, mozü ki kilong nung dang masü saka kima dena peisasa yipten bener arua laoker, yangji shiranger agi tasüng mejanga lir saka anepalur mali ta yimdangi arua angutsüla. Iba amaji matalokdaksütsü atema tang anema alirtemi mozü kidang inyaktertem yaritsübaji, mozü kidang oagi parnok mapa nung yarisemtsüba masü saka asenoksasa asenok meshirangtsü merangbaji doctor aser nurse-tem mapa nung yarisemer amai asütsü. Talisa asen lima nung mozü kidang inyaktertem agi kanga anünga lir, anungji tang mozü ki masüng shirangertem kar aliba purtem yaritsübaji mapa tulu lir. Iba ama mapang ano, tia mejungi, mozü kidang inyaktertemiang shirangadokra matong ali nung temdok ama asütsü. Atangji, tanga mapa nungbo nungdakra nübertem rongnunga nübo agi yariteptsübaji temulunger aika adoktsü, ajisüaka mozü kidang shiranger yaritsübo temulungtetba kisüng agi makoktsü, saka mozü metetter aser shiranger yaritsü shia meteta azüngertemiang yaritettsü. Iba ama tensa tia ka nung, asenoki mozü kidang inyaktertem yaritsübaji parnoki ashiba angaa asenok lokti mesentepi alitsü, menüngdakba nung kimalen mesenzütsü, kismettsüsemi maotsü, koda masü kanga nungdak nung jajadang teti teni tebang nembanga mask temerük agitsü, teti sapon agi teben shidoktsü, temang tashi itta alitsüsa süngolemba aser süngjanglijang agi tua chiyongtsü shitak achitsü aser neptsübangtsü yima, aketa mesüra tekolak menüa aser temang metaa temang tera danga meshitaki kümra, doctor-tem den asüngdangtepa yakta mozü achi tenzütsü. Iba ama kidang temang meshitaki amongdang, ki ka nung asüyonga, akok tashi, kinungertem den külemi takdang ka nung melii balala nung lia chia ajemtsü aser mejangtsü. Iba ama asensasa kümdangba agi, asenok shiranga adok nungbo mozü kidanga mesemi shiranger bendentsüba tensa tia to memetetika melenadoktsü. Kodang mozü kidang, tang ama tashidak wara tamajung agi shirangertem yarir meyarima arudir, idakji inyaktertema tali aniapongtsü aser meperimanang aser petsaperong aika adoktsü. Tang tashi Covid-19 tashidak ya kong komaser poktetar mejangjar, saka nisung mapa ajanga poktetba tashidak lir. Iba kasaji Covid agi shirangertem anepalu mesütet, mozü kitem aika nung timtem lendong atalokbajia nisungi yangluba timtem asütsü. Iba amaji matalokdaksütsü yarisemertemji asenok asütsüla.

## OLEMSABANG

### Goshen nung Israel kin alar tia

~ Süpongnüsang Longkümer, Darogapathar Dimapur.

Ijip nung Yosef aser teti nunger ajak sümar semchirtem suyapokya alitang Yosef memetetba chuba ka adoka Ibri (Hebrew) nunger kanga mejungi rishikangshi tenzüka alar tiya jenjangi ai, saka Ibri nungerji kanga süyapokya Ijip dang nungi kin tuluba küma alitang Faraao jagi kanga tsüpua Shifra aser Pua dang Ibri tsüri tanur asü dang tepor süra tepsetang saka tetsür süra tetepset ta ozüng agütsü. Saka tenati Tsüngrem tsüpu nung chubai ashibaji mangai jabasotemji metepset. Anungji chubai tena dang kechiba tashi manger ta asüngtang nung Ibri tsürtemji Ijipsür ama masü parnok kanga tekümtang ta langzüba Anitet 1:15-19 nung angur. Nusu yarirtemi Tsüngrem tsüpu nung Tsüngremi Ibri nunger jendi rendaktsü. Anungji Faraoi, Ibri jabasotemji Nile ayong nung ajongokjang ta ozüng agütsü. Tekong 21,22 Ibri nungerji kang rena kin tulu aküm nung samadaksütsü rishikangshi. Anungji Tsüngremi temerenshi ter agi Ijip nungerji merenshitang Ibri jabasotem Nile ayong nung samatsüba dang nungi timba konung agi Ijip nunger kibong shia nung tepsetsü dang Ibri nunger dang ashi "Ni Kibubaji lir" Kikümdong nung azüji nenok asoshi temaitsü alitsü, kikümdong nung azüji ngura ni nenok süa aotsü aser Ijip nunger dak atongba wara jagi nenok matongtsü Anitet 12: 12-13.29. Aji sür külen Ibri nungerji Tetsür tanur medeni tepor meyi noklang trok shi Ramses nungi sukkot tashi tetsüng agi jaja ao.t 27 Ibri nungerji temerem tzyim donger Mosa ajok agi tzyimji sadang aser tesülen mepet tongshi tejaklen mi tongshi agi ania Ibri nungr ajaki Tzyimküme tonger Tsüngremi Mosa tang nü teka tzyim manungji songdokang ta ashiba ama pai songdak aser tzyimji mezüng ama atsüngpang. saka Ijip chubai anir Ibri nunger aria aortemji ajak temerem tzyim nungji samatsü Anitet 14:26-31 Faraao ozüng agi Israel jabasotem Nile ayong nung samatsüba ama temerem tzyim nungpo chubai anir temeranger tem ajak Tsüngremi samatsü. Israel nunger Ijip lima küm 430 Alaashi ngua Tsüngrem mulung meyipba Israel dak rangloker mangyang yangtsüba azünger. Ja 9:4 nunga yamai shia lir, Alimai ai mesüra ai tajem meyiba mesüra süngdong kecha mekongshitsü, saka shirnok tenütsü nung Tsüngrem temaitsü ajenba mali itempurji tang kangshitsü asoshi parnok dang ashi.

Yisu Khrista alimai arur küm meyi ana dak jia pa dak amangertem jendisa jendi rishikangshia tepseta arudang tesem tesem nungpo kanga tamajunger dak mang yangtsüba otsü nung angazüker. Laishiba tapu aika nung alima tatempang indang angur, Yisu nütsüngtemi alima tatempang temaitsü asüngtangba Mathi 24: 1-35 angur aser item tekong rongnung t 14 kotak yimli osang tajung alima ajonga nung kin ajak dang kuli asütsü asoshi sayutsüngitsü, aser idangji tatem arutsü. Iba sayutsüngi yapo tenla kidang sayutsüngiba ama masü saka temerem tzyim nung Ijip nunger dang sayutsüngiba ama angateter. Ibai angatetsü atema J adok 11 nung kulisür ana indang angutsü. Kulisür anaji Yisu sentsü melen nü adokba Mosa aser Elija Math 17:3. Ibri nunger Tsüngrem külemi modaktsüba yong Tsüngremi Mosa ajanga Ijip temerenshi Ter agi merenshiba ama Ibri nungeri Yisu kangki nung tepsetba ajanga Ijip wara agi parnok merenshitsü saka taküm alir ajak tanüla nunga kümzüksü, Elijai küm asem tashi azüngtzü aser tsünglu marudaktsü 1 Chuba 16:32-34. 17 :1. Yamaji tenati Israel temerenshi tulu agi sayutsüngitsü. Oliv totzü süngdong ana, Milindong ana, J adok 11:4 nung shia aliba jagi Mosa aser Elija ta jangjatsür. Iba tapu ajak züngra angatetsü. Teküpoklen agüja aliba tapu ajakji pushia züngra tali jangjar. Tekong 14 Tanapuba ayatai süiogo, ajiang tasempuba ayataiji yakta arudagi. Tanapuba ayatai yagi Ita 42, Anogo 1260, Küm asem sür tesadang. Tasempuba ayatai jagi küm asem sür tesadang JA 11:1-2 iba mapang ji Mathi 24: 15 ataloktsü südi ta angateter, saka Tsüngrem miim oji Pai tang metet, asenoki sarasatema atati Tazünger Tsüngremi oajangma Amen.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**



## Vietnam nung Covid prokba nokdangtsü atema Tenla kitem shibanger



Vietnam kübok Ho Chi Minh City nung aliba Tan Dinh Arogo Tenla ki noksa nung angur. Iba Tenla ki ya 1874 küm yanglu tenzük aser 1876 küm tatemlen renema liasü.

**May 09, 2021:** Vietnam linük nung Khristan lenirtemi Arogotem dang coronavirus tashidak prokba nokdangtsü atema Tenla kitem shibangtsü metetdaksüogo.

Bac Ninh Bishop's House office nung tongti putir, Francis Xavier Nguyen Van Thang-i, April 27, 2021 nungi tenzükä linük nung coronavirus tashidak tang agi pezübenbuba prokdar, ta metetdakja Khristantem dang Health ketdangsertemi tuyuba shidak benshitsu aser Arogotem dang pei Arogo dak apet inyaksü metetdaksü.

Putirisa, sorkari tenokdangba balala benoka aliba tesentem nung aliba Arogotem nung putirtemi dang tekülem sentong nung adentsüla aser tekülem sentongji tongmelang agidang agitsüla, ta metetdaksü.

"Nija aser kibongtemi sarasademtsü atemabo Tenla kitem lapoka yutsütsüla," ta

May 7 nü putir, Thang-i metetdaksü.

Teintet sensotem, shirangertem aser coronavirus tashidak keta alitsü südi ta melung melemi bilemertem aser quarantine nung alirtemi online ajanga dang tekülem sentong nung adentsüla, ta putiri mepishia metetdaksü.

Paisa amangbapurtem dang anogo shia sarasademtsü atema metetdaksü.

Da Nang Bishop's House office nung tongti, Paul Pham Thanh Thao-i sangdong ka ajanga, sorkar ketdangsertemi May 4 nungi tenzükä Da Nang nung sobaliba, tamangba yimsü aser saisapong sentongtem anentsü atema metetdaksüogo aser May 5 nungi Hoi An in Quang Nam province nunga item sentong magitsü atema metetdaksüogo, ta metetdaksü.

Putir, Joseph Dang Duc Ngan-i Arogotem dang osang

tasen ka memetdaksü tashi tesem ana nungji Khristan sentongtem kecha magitsü metetdaksü saka online ajanga tekülem sentong nungbo adentsü metetdaksü.

Vietnam nungsa Thai Binh nung putir, Peter Nguyen Van De-i Khristantem dang coronavirus wara nokdangba maparen nung tangar den den yariteptsü metetdaksü.

Paisa, tang tashi coronavirus menokdangteter, anungji züngsemtemi akok tashi ainlen mejajatsüla, ta metetdaksü.

Ba Ria Arogo nung putir, Joseph Vo Cong Tien-ia Arogotem dang Tenla kidang tekülem sentong nung nisung 50 dak tema madentsü metetdaksü.

Vietnam linük nung April 27 nü coronavirus pezübubaren prok tenzükba sülen yimti 19 nung nisung 176 dak iba tashidak putetogo. Yimti 24 nungbo school tema shibangogo

## Ireland nung May 10 nungi Tenla kitem lapoktsü

**May 09, 2021:** Coronavirus wara ajanga Ireland nung küm ka jungnüa Tenla kitem shibanga liasü, ajisüaka Hombar (May 10) nungi tanaben Tenla kitem lapoktsü.

May 10 nungi Tenla kitem nung tekülem sentong agitsü melatsü, ajisüaka Khristan lenirtemi shidi ka ajanga Ireland Ato kilonser, Micheál Martin TD dang joko kodanga linük nung Tenla ki meshibangdaksütsüla, ta takhangba agütsü.

Khristan lenirtemi Ato kilonser dang, linük temzüng nung aliba ama tamangba yimsü temeden agütsütsüla aser meimchir temeden kümzüka ayutsüla; loktiliba atema Arogo ya tongtibang, anungji joko kodanga tekülem sentong agiba menokdangtsüla, ta takhangba agütsü.

Linük nung commercial

dokantembo lapoktsü temelaba agütsü saka Tenla kidang lokti adenshia tekülem sentong agibabo nokdanga liasü.

Khristan lenirtemi Ato kilonser dangi züluba shidiji ADF International-ia pusemogo.

Khristan lenirtemi züluba shidi nungji yamai zülua lir, "Ner sorkari lokti tekülem sentong agiba nokdangtsü nungdak ta ashi. Atangji tamangertem ama wara nungi nisungtem kümzüksüji tongtibang ta onoki meteta lir. Ajisüaka Commercial dokantem lapoktsü temelaba agütsüyonga Arogotem anema tenokdangba benokbaji tim masü. Dry-cleaners, bicycle dokan aser super markets lapoktsü mela. Iba dak alia Europe linük aika nung tekülem sentong tanaben agitsü mela saka Ireland sorkari menor ang melar."

ADF International nung

legal counsel, Lorcán Price-i, "Ireland sorkari mapang talangka Tenla kitem shibangdaksüba kuliji onoki mejangja. Tanga Europe linüktem nungbo tekümdangtsü kar tuyua tekülem sentong agidakja arur," ta ashi.

Osang angazükba agi, Tenla kitem tanaben lapokyonga asüpila sentong aser kiyimba sentongtem nung nisung 50 tashi dang melatsü.

Northern Ireland nung aliba Arogotem nungbo taküm March 26 nungi tenzükä Tenla kitem lapok, ajisüaka Khristmas mapang nung Khristan sentongtem nung coronavirus prokba agi yaküm December 26 nungi tang tashi south tsütsülenbo Tenla kitem melapokdaksü.

Ireland nung tang tashi nung coronavirus tashidak agi nisung 4,899 süogo.

## ANOGO ABEN TSÜNGREM DEN

## Talila talubusa

*Tang, asenok dak inyakba ain amato, shibai asenoki asüngdangba aser bilemba ajak dang kanga tali inyaksü akoker. Efesa 3:20.*

Tsüngrem asoshi aser Pa arogo asoshi mapa meranga inyakba agi asenoki Tsüngrem peladaksür ta bilemer. Aji saka Tsüngremi nisung tesüngmangtsü ka yangluba nisung tejangraba agi Pa peladaksür (T.Ken 8:3-4). Tsüngremi na ajanga inyakba mapa dang nungi tuluba nai ne sasa ne alizüng ayutsü makok. Tangar dang nungi tali Tsüngrem peladaksütsü asoshi Tarsus nung Saul mapa tangar dangi tali pai meranga inyak, saka pai meranga inyak nung Tsüngremi pa taküm asoshi inyakba den medemdang dang pa mapaji jana rüja dang liasü ta pai bushitet. (Fil. 3:7-8).

Asenok tebilemetsüji aseni yangluba sentong nunga aseni melamela jangratemer. Asenoki tamaren mapa inyaksü merangra asenok taküm nung tashi teperi akatsüla, iba jagi Tsüngremi asenok dang pelatsü ta bilemer. Tsüngrem nungi tajaba asenoki mangashi tashi asen taküm indang asenoki nukla dangi arutsü makok mesüra Tsüngremi asenok ajanga ataloktsütsü taaka bilemetsü makok.

Asenoki bilemba dang nungi Tebui Pa aini asen tashi mait atendanga oa angur ta asenok sasa bilemtettsü tenüngdaksü lir. Asenoki asen tebilembaji tesülen yutsütsüla. Asenoki asen pungmangtem nung temulung süa malitsüla kechiaser itemji kechi koma jangratemtsü südir süang teti atema masü. Kodang asenoki Tsüngremi tuyuba nung odir asen taküm nung Tsüngrem mapa inyakba aseni metettsü aser ibaji Pa tashi ain dena aliba ajanga dang rasaa ashitsü akok. Ajak nung asenok koda temulung süa alitsü?

## Tenzükba wadang nung temsüa lira tetsür-a pastor shimtsüla: CMA

**May 09, 2021:** Evangelical agütsür, ta ashi. telok- Christian & Missionary Alliance (CMA) nung lenirtem aikati, Tsüngrem tenzükba wadang nung temsüa dang lira tetsürtema pastor shimtsüla aser "Reverend" title agütsütsüla, ta ashi.

Tawa CMA Tir, John Stumbo-i sangdong ka ajanga, tesüiba küm ana tsüngda CMA-i online ajanga Alliance lenir 3,000 tema den tongtepratepa jembiba ajanga CMA indang ordination inyakyim agi melung masüba jangjaogo, ta metetdaksü.

Stumbo-i, "Lenirtem shilem 72-i pastor tem dang putir ama züngshitsüla ta ashi aser shilem 58-i Laishiba ajanga Arogo nung putirtemji teburtem dang asütsü atema shia lir ta ashi," ta metetdaksü.

Alliance nung lenirtemisa, lenisüba tsütsü tetsürtem nem tapet shilem agütsütsüla ta ashi. Lenirtem shilem 50-i tetsürtem atema tang inyakyim ya shidak ta ashi saka shilem 40-ibo tetsürtem nem tim shilem magütsür, ta ashi; ano shilem 10-ibo tetsürtem nem shilem tali

Stumbo-i ashiba agi, tang-tangbo inyakyim memelenshitsu, ajisüaka tongtepratepa shisa lemsatepba nukjidong ya Arogotem ajanga Tsüngremer tenyaba mapa ataloktsüba maparen tajungba akümtsü atema lir. "Telung nung mangatettep malitsü aser tenzükba wadang tajungba inyaksü atema onoki inyakyim melenshitsu meranger," ta pai metetdaksü. Stumbo-isa, tan ita tatemlen nungi tenzükä Nashville nung Alliance Council senden nung shisa lemsateptsü aser tenzükba wadang nung tebur nem tim shilem agütsütsü aser tetsür o tebur na tsüngda tebandang shisadangtsü, ta metetdaksü. "Laishiba nung ajemdaker inyakyim melenshitsu. Asenoki külemi Laishiba lapoka shisadangra telemtetba tajung ka agitettsü," ta pai ashi. US nung aliba CMA indang Arogo 2,000 nung züngsem 500,000 shi lir aser Arogo kübok missionary 700-i linük 70 nung tenzükdar.




**OLONG PAITEP # 5807**

|    |  |   |   |  |    |  |   |   |  |    |
|----|--|---|---|--|----|--|---|---|--|----|
| 1  |  |   |   |  | 2  |  | 3 |   |  |    |
|    |  |   |   |  |    |  |   |   |  |    |
|    |  | 4 |   |  |    |  |   |   |  |    |
| 5  |  |   |   |  |    |  | 6 |   |  |    |
|    |  |   |   |  |    |  |   |   |  |    |
|    |  |   | 7 |  |    |  |   |   |  | 8  |
|    |  |   |   |  |    |  |   | 9 |  |    |
| 10 |  |   |   |  | 11 |  |   |   |  |    |
|    |  |   |   |  |    |  |   |   |  |    |
|    |  |   |   |  |    |  |   |   |  |    |
| 12 |  |   |   |  |    |  |   |   |  | 13 |

- |                                 |       |                             |       |
|---------------------------------|-------|-----------------------------|-------|
| <b>TIPIEN</b>                   |       | <b>LANGTSÜNGLEN</b>         |       |
| 1. Teburchi masü                | - (4) | 1. Lenmang aika ajurutepdak | - (6) |
| 2. Tema nung masü               | - (6) | 2. Iba anogo                | - (4) |
| 5. Tezü agi yangluba kongki     | - (6) | 3. Asüngdangba ash          | - (6) |
| 6. Yisu amenba shiruru          | - (4) | 4. Aou tapu ka              | - (3) |
| 7. Jalua bilem                  | - (5) | 7. Tebu ka chirnurtem       | - (6) |
| 10. Onsara /Aika                | - (4) | 8. ----- ren                | - (6) |
| 11. Lenmang nung temeyipokdak   | - (6) | 9. Pei indang aküm          | - (3) |
| 12. Shiruru tetsü masü          | - (6) | 11. Ali agi akümba          | - (4) |
| 13. Alima nung ayong talangtiba | - (4) |                             |       |

**OLONG PAITEP # 5806 TELANGZÜBA**

- |                                 |  |
|---------------------------------|--|
| <b>TIPIEN :</b>                 | <b>LANGTSÜNGLEN :</b>                    |
| 1. Chikok, 5. Injung, 6. Koya,  | 2. Inyaktet, 3. Kija, 4. Ana, 6. Korang, |
| 7. Ajob, 10. Artsü, 11. Belen,  | 8. Bilemtet, 9. Sentep, 13. Anüm,        |
| 12. Tera, 15. Atep, 16. Anatsü, | 14. Ano.                                 |
| 17. Moatsü.                     |  |



**Kibur Alokba dang asüngdang**

Kibur : O Aokba, nenok alimasanger aser ner Naga nungera kechi Sendong nung lidar ?

Alokba : O Kibuba,kechi ashitsü naia nguadang lir, Kibuba Arogo nung X mas sentong melena corona den raratsü sentong, New year Sentong melena Covid 19 nokdangtsü sentong, Mothers day aser Fathers day Sendong melena vaccine raktepba sentong, Good Friday, Easther Sunday Sentong melena tenla ki shibangtsü sentong, Ano Alima terenlok Sentong melema toluri anir yimsüsürtem ajak wara den raratsü sentong, Sobaliba awashi kiboksem sentong melena mepu mepu kiyonger O kiyonger tsüngda atsü atsü dangtsü sendong, Asüpila sentong nung atentsü melena mang anasai maotsü sentong, Kiyonger dang pei ama meimtsü melena sempateptsü sentong, Lanurtem schooli yoktsü melena kimai meyoktsü sentong, Aser kinunger tsüngda nung masü saka Aadhaar o PAN na den Covid vaccine agiba Link yangluba sentong, Kibuba ano aika lir !!!

Kibur : O Alokba, ya Kü Sentong lir. !!!

*Lilir : I. Kilang Ajem, Indisen, Dimapur.*

**TANÜBO NAI LANGZÜANG**

Q. Asiatic Lion indang IUCN Status ji \_\_\_\_ lir.

A. Critically Endangered                      B. Endangered

C. Vulnerable                                      D. Extinct

===== (Taruba adok nung onoki langzütsü)


**YASHI ADOK TELANGZÜBA : June 9, 1941**

**AO OSHI ANGAZÜKDAK:**

**TANÜ ANGAZÜKTSÜBA OJANG**

**Hai**  
(v) Mulunga lir ta langzüba (yes)  
\* Kütsüi tenyaba ajak ni hai ta tashi angaa inyak.

**Hau**  
(v) Shitaka ta langzüba (confirm)  
\* Sannükeri asüngdangba ajak kiyimla aser kiyimsang na pronglai hau ta langzü.




Tir Yimyim

**Happy Birthday**

Tenüng : Lensanir M Jamir  
Tasoba anogo : May 10, 2015  
Kum : 6                                      Yim : Akhoya  
Class : KG- A  
School : Vineyard Schooi Kohima  
Talidak : New Minister's Hill Kohima

Jabaso Lensanir küm terok (6 ) tashi Tsüngremer taochi akhüm nung len ania moaja aruba asoshi pa tenüng asanger.  
Ano Kibuba tsübuba den anema aliba aser arishi talang moajang ta sarasademtsür.

**Temeim Oja, Oba, Liana aser Kinungertem.**



**NAI-A YA METETTER MA?**

**"Hin Sam Wan" (Three Whale Rock)**



Thailand nung Mueang Bueng Kan District kübok Khok Kong tesem nung Whale mesük lung tulu asem lir. Hin Sam Wan, koba tetezü 'Three Whale Rock' lir, item lung ya küm million 75 tejen alitsü aser antüng nungi whale telok ka ama angur astinung iba dang Hin Sam Wan nungja agütsü.

| SUDOKU # 5851 |   |   |   |   | TELANGZÜBA # 5850 |   |   |   |   |   |   |   |   |   |   |
|---------------|---|---|---|---|-------------------|---|---|---|---|---|---|---|---|---|---|
|               |   | 7 |   | 9 | 6                 | 6 | 2 | 4 | 5 | 8 | 3 | 9 | 7 | 1 |   |
|               |   | 3 |   | 1 |                   | 5 | 9 | 7 | 1 | 2 | 6 | 3 | 4 | 8 |   |
| 6             | 5 | 4 | 8 |   |                   | 8 | 3 | 1 | 9 | 4 | 7 | 2 | 6 | 5 |   |
|               | 9 | 7 |   |   | 4                 | 9 | 1 | 6 | 3 | 7 | 5 | 4 | 8 | 2 |   |
| 8             |   | 1 |   |   |                   | 2 | 5 | 8 | 4 | 1 | 9 | 6 | 3 | 7 |   |
|               | 7 |   | 8 | 9 | 2                 | 5 | 4 | 7 | 3 | 8 | 6 | 2 | 5 | 1 | 9 |
| 1             | 6 |   |   |   |                   | 3 | 1 | 4 | 5 | 6 | 9 | 8 | 7 | 2 | 3 |
|               |   | 6 | 5 |   |                   | 2 | 3 | 8 | 2 | 7 | 5 | 4 | 1 | 9 | 6 |
| 9             |   |   |   |   |                   |   | 7 | 6 | 9 | 2 | 3 | 1 | 8 | 5 | 4 |

**OJANG LUTEP # 5393**

AATRNG :

SAAIHIMTT :

SHTTEIA :

SNEAI :

IKBNYAA :

DNE :

DEEMMA :

JITEBSÜM :

NNKGDÜA :

MOKAERD :

**OJANG LUTEP TELANGZÜBA # 5392**

**ALIMA NUNG TETSÜ TEMEIMJI KECHA DENA MEDEMDANGTSÜ MAKOKBA TEMEIM LIR**

**TAN HOPTA ATEMA - KOMA SÜLA ?**

Q. Asen lima nung Covid-19 agi shirangertem anepalutsü pur doctor aser nurse-tem agi meperi aküm nunga koma süla ?

Olong 20 shi nung May 14, 2021 tashi nung iba telangzüba ya onok dangi (e-mail - tiryimyim@gmail.com) :  
(SMS - 9856121232 / 9436072422) : (WhatsApp - 7005723372 / 8729995804) : (tiryimyim.in) ajanga yokang. Telangzübatemji taruba Honibarnü adoktsüsü.





New Delhi, May 09, 2021: Amongnū New Delhi nung aliba Nigambodh Ghat cremation ground nung coronavirus agi shiranga asürtem tasümang rongdokba noksa nung angur.

## Linük 42-i India nem oxygen aser Remdesivir agütsütsü nangzük

**New Delhi, Monupii/May 09 (Agencies):** Tang India linük nung coronavirus wara anema sashia raraba mapang nung linük 42-i India yaritsü ta nangzük, aser item linüktem nungjagi linük 21-ibo linük yariogo.

Tang India-i oxygen aser nungdakba mozü aika kanga nungdaker. India nung aliba hospitals aser medical centres nung medical oxygen supplies den oxygen adokdaksüba osettem aser Remdesivir ama antiviral mozü balala nungdaker.

Tang India nung medical oxygen supply 5700 MT adokdakja aliba nungi tangbo 9480 MT adokdaksür, ajisüaka iba jagi meperiba ajanga teyari nungdaker.

Alima linük balala nungi

India-i oxygen cylinders 20,000, oxygen concentrators 11,000, oxygen tankers 30 aser oxygen generator plants 75 nguogo. Oxygen tankers 30 nungjagi 9 dang India tongogo aser ano tankers 21 angutsü.

Ministry of External Affairs-i 50,000MT plants amenoktsü atema inyakdar. Tang Oxygen tankers 1,172 lir, oxygen tankers 102,400 aser oxygen concentrators lakh 1 aliogo.

Remdesivir mozü dak sendakba nung, linük nung iba mozü crore 1 yanglutsü (anogo shia lakh 34) aser America nung biopharmaceutical company Gilead Sciences-ia Honibarnü Remdesivir vials lakh 1.5 agütsüogo.

Egypt nung aliba Eva Pharma-i India nem

Remdesivir dose lakh 4 agütsütsü. Iba dak alia Bangladesh, Germany, Uzbekistan aser UAE linüktemia India nem Remdesivir mozü agütsüogo.

Item linük nungi India-i Remdesivir vials lakh 16 angutsü aser Switzerland nung aliba Roche-i antiviral mozü tocilizumab agütsütsü.

India-isa Russia linük nungi favipiravir mozü angutsü.

Alima tesem balala nungi India-i teyari ngudar, aser lenir aikati linüktemi teyari nungdakba mapang nung India-i yariba metetdakja tang India yaritsü ayongzük.

Tawa US Tir, Joe Biden-ia, "Tetenzüklen asenok timtemba mapang nung India-i asenok yariogo," ta metetdakja liasü.

## Jail nung wara meproksü atema tepuokdak alirtem chioktsüla: SC

**New Delhi, May 09 (Agencies):** Tepuokdak alirtem taküm alitsü temeden kümzuka ayutsü atema Amongnū Supreme Court-i state tem dang, jail nung nisung tali puoka aliba tebilemetsü bentettsü aser jail nung coronavirus tashidak prokba nokdangtsü atema tepuokdak alirtem chioktsü atema asadangang; ken o tilateri nung puoka alirtembo chioktsü akok, regular bail mesüra parole nung chioktsü akok, ta metetdaksü.

SC-isa, parole mesüra bail nung chiokyonga linük tesem aika shibanga aliba nung ajemdaker parnoki lenmang nung timtem majurutsü atema inyaksüla, ta ashi.

SC-i state sorkartem dang, SC tetuyuba nung ajemdaker chioktuba ajak pei ki atongtsü atema parnok nem transport facility agütsütsüla, ta metetdaksü.

Chief Justice N V Ramana aser Justices- L N Rao aser Surya Kant nungeri akümba bench-i, "State kar shibanga aliba mesüra curfew ozüing benoka aliba nung ajemdaker timtem majurutsü atema tepuokdak nungi chiokertem nem transportation agütsütsü atema inyaksüla," ta tuyu.

Jail nung coronavirus prokba nokdangtsüla; jail nung puoka alirtem aser staff

tem mapang shia tendangtsüla aser treatment agütsütsüla, ta SC-i metetdaksü.

Tang India linük nung jail 1,350 tashi lir aser item jail rongnung sub-jails 617, district jails 410, central jails 144, open jails 86, special jails 41, women jails 31, Borstal schools & others 42 lir.

Item tepuokdak nisung 4,03,739 tashi puoka yutettsü, ajisüaka 2019 December nung item jail nung nisung 4,78,600 (nisung 75,000) agi tali puoka liasü. Jail nung puoka alirtem rongnung tetsür 19,913 densema lir.

CJI-i aniba bench-isa, "Jail kar nungbo nisung tali puoka lir. Tepuokdak nisung tali nungtepa ayubaji health atema tebilemetsü onük ka lir, aser taküm alitsü temeden anema lir," ta metetdaksü.

Yaküm March 11 nü WHO-i Covid-19 ya wara ka lir, ta sangdongba sülen hopta ka tsüingda SC-i state tem dang tepuokdak alirtem anogo 90 atema bail mesüra parole nung chioktsü atema high-powered committees tentetang, ta tuyua liasü.

Ajisüaka taküm January aser February ita nung iba wara süngjempa agi bail nung chioka alirtem dang tepuokdaka tanaben arung, ta tuyua liasü.



May 09, 2021 nü Mumbai nung aliba Nesco Jumbo Covid 19 Centre nung staff temi oxygen densema medical nungdak balala meshia longkak aitba noksa nung angur.

## Covid tensa atema party ajak senden ayongtsüla: Mallikarjun

**New Delhi, May 09 (Agencies):** Amongnū Rajya Sabha nung opposition lenir, Mallikarjun Kharge-i shidi ka ajanga Ato kilonser, Narendra Modi aser Rajya Sabha Chairman, M Venkaiah Naidu na dang, linük nung coronavirus tensa atema o lemteptsü asoshi party ajak senden ka ayongzüksüla, aser Parliament Standing Committees senden-a ayongzuka amentsüla, ta mepishia metetdaksü.

Tang linük nung coronavirus tensa azüoktsü atema Congress Party lenir, Kharge-isa Ato kilonser den tebilemba onük trok lemsat.

"Nisung ajak nem vaccine

angati agütsütsü atema Union Budget nung lemzükja aliba sen crore 35,000 ji amshitsüla. Vaccine aika yanglutsü atema ajak nem license agütsütsüla," ta pai züluba shidi nungji shia lir.

Paisa, sensakertem khuret pungbatsü atema Mahatma Gandhi National Rural Employment Guarantee Act (MNREGA) kübok aayangba anogo 200 kümstsütsüla, ta ashi.


Honibarnü Congress Party Tir, Sonia Gandhi-ia tang linük nung wara tensa atema o lemteptsü asoshi yimtenren party ajak senden aser Parliament Standing Committee on Health senden ayongzüksüla, ta jembia liasü.



Kolkata, May 09, 2021: Amongnū Nobel laureate, Rabindranath Tagore asoba anogomong sentong nung West Bengal Chief Minister, Mamata Banerjee adenba noksa nung angur.



## Kabul nung school anasa bomb agi nisung aika pokset



**Kabul, Monupii/May 09**

**(Agencies):** Kabul anüolen Shia district kübok school ka anasa bomb apokba lendong nung nisung asür ajaki agi 58 jungogo, ta Afghan ketdangsürtemi ashir aser doctor temi iba lendong nung yirua alir nisung 150 shi anepalutsü makoker.

Honibar nikongdang iba bomb apokba ajanga yimti kübok Dasht-e-Barchi tesem anokshitsü. Taoba mapanga Islamic State temi Afghanistan nung tamangba yimsü tsütsü nütsüng tajemba aliba tesem nunga tenük yoker lendong agüja aru.

Asürtem rongnung nisung tenet mesüra ti dang school tanur liasü, shirnok school temer pei kidangi meyipa aor liasü, ta tenük kuli alir kati osangbener dang ashi.

Iba lendong nung asürtem ya yimti anüolen tsütsü aremer aser nisung tasü mang bendena ayudak ano temang aika lir. Deobarnüa nisung karbo samar aliba kinungertem bushia mozüki kima adenshir jara nung tenüng zülua aliba züngdanga aser nisung tasü mang bendena ayudak

adenshia liasü.

September 11 tashinung US sepai ajunga anizüker aotsü ta Washington-i taoba ita sangdongba sülen Kabul ya saksalema lir, aser Taliban-i linük tesem ajungalen lendong agütsü tenzüko, ta Afghan ketdangsürtemi ashir.

Honibar lendong indang telok katia tenüng agia mali.

Afghan Tir Ashraf Ghani-i sangdong ka nung iba lendong aitsü aser Taliban tenüng asen, saka parnoki magizüker. Pai kuli kecha magütsü.

"Taliban teloki meshidakba nung rara aser azüdokshi tali agüja ano maneni tang tensa yimjung aser yimya tajungtiba nung angateteptsü memolunger ta sayua aruba kisüng masü tensa tali tepenjaba kumdaktsür," ta Ghani-i ashi.

Taliban telokia iba lendong aitsü aser parnok mapa masü, ta ashi.

Taoba mapanga ISIL (ISIS) temi mapang shia lendong agütsüba tesem ka nung Honibarnü iba lendong ya atalok.

Iba lendong ya nikongdang 5:30 ako meta atalok, ta Kabul

nungi osangbener kati ashi.

Iba mapang ya kaketshir noklang aika class temer kidangi meyipa aor, ta osangbeneri ashi.

Bomb asem atongtepa apok aser iba mapang kaketshir tetsürtem ya tetsüpu nung jepteba asemzua liasü aser kari pei tetsü jashia ajep aser aika mozü kidangi anir ao.

Iba kaket reju ya tetsür aser teburtem atema lir, shirnok mapang shilem asem lemsar adener, aser tanabuba shilem nung tetsür kaketshirtem liasü, ta education ministry indang odongtar Najiba Arian-i osangbener dang ashi.

Taoba küm May ita telungpur temi Dasht-e-Barchi tesem nung mozüki ka anüngdang maka nisung 25 asü, aser item rongnung kinü tanur tetsü 16 densema liasü.

Iba mozüki ya Doctors Without Borders (Medecins Sans Frontieres, mesüra MSF) ajanga anepalua liasü, saka lendong atalokba sülen parnok iba project nungi ainshi.

Iba lendong atema telok katia tenüng magi, saka Tir Ghani-i Taliban aser ISIL tenüng sena liasü.

## London mayor inyaktsü Sadiq Khan tanaben shimtet

**London, Monupii/May 09**

**(Agencies):** Sadiq Khan ya London nung mayor tanaben inyaktsü shimtetogo, aser ibaji ajanga opposition Labour party tashi itshir.

2016 küm agiba election nung takok anguba sülen anüolen linük tongti ka indang yimtiba nung tekolak asüba Muslim nunger pa mezüngbuba akum, aser Brehostibarnü agiba election nung pai vote shilem 55.2 angu aser tang yimsü tesüdak Conservative party nungi Shaun Bailey-i shilem 44.8 nguteta liasü.

Iba election nung temsüa alir vote agütsür shilem 42 liasü, koba 2016 küm agiba election nung shilem agir dang nungi tajemba liasü.

"Alima nung yimti tajungtiba maneni anitsü atema London nung alirtemi küdak tamang katetba atema ni ajemalushir," ta Khan-i ashi, shibai nütsüng yongsük million teku alidak mapa tali agütsütsü asoshi rangloker nübu yima liasü.

Arishi küm 50 tain, Khan-i ashiba agi, pa indang kümsük tanabuba nung kin balala tsüngda aser city hall aser

sorkar tsüngta apu alaba nung rangloksü.

Khan ya Brexit anemer aser Conservative telok nungi Boris Johnson densema ato kilonser ana den meputepi liasü aser ano taoba US Tir Donald Trump den mangatetep adoka liasü.

Muslim nunger aliba linük kar nungi US-i arutsü memelaba atema Khan-i Trump sashi sashia aija liasü.

England kübok danga tesemtem nung Johnson-i takok tulu ngutetaka, London nungbo opposition party tashi tuluba akumer.

## Nasheed amaker ka puogo: Maldives police

**Malé, Monupii/May 9**

**(Agencies):** Maldives police-i Deobarnü ashiba agi, linük indang taoba tir kanga mejungi yirutsüba

lendong atalokdaksürtem rongnung tongtiba asütsü ta temulung meleme bilemba nisung ka puogo. Iba lendong adokdaksüba ya Muslim extremists tem dak tai tongloksüogo.

Police-isa, temulung meleme bilemer pezü rongnung asembo puogo, ta ashi. Brehostibarnü Mohamed Nasheed dak rangloker bomb ka pokloksü. Nasheed ya tang Parliament nung speaker lir aser pa surgery agika agiba sülen tang mozükidang temang anepaludar.

Police-i iba nisungba indang osang tejangja kecha magütsü, saka test message ka ajanga Honibarnü maitsü jangjatsü atema noksa sayaba nisungba ya pa asütsü ta bilemba jangjatsüogo.

Ketdangsürtemi Nasheed amakba ya Islamic extremists tem dak tai tongloksüogo, saka bushitsüngdangertemi tang tashi koba teloki lendong bener arutsü iba indang jangjaa mali. Iba lendong nung

Nasheed indang bodyguard ana aser British nunger ka densema iba tesem anasa nokdak alir ana yiru.

Sunni Muslim nungeri amokbanger aliba linük, kong ozüng agi tanga tamangba yimsü amangtsü memelar, iba linük nung Nasheed-i yimjak nung religious extremism aija arudar. Pa anüolen aliba linük den tesendaktep aliba aser liberal policies benoktsü merangba atema tamangba yimsü kanga metsüngareta beshirtemi pa aija arudar.

Mozüki ketdangsürtemi ashiba agi, arishi küm 53 tain Nasheed, teku, tekolak, tepok aser tetsü surgery agiba sülen maneni intensive care unit nung yau lir. Kasa mapang nung par kinunger kati Deobarnü Twitter ajanga, Nasheed par kinunger kar den mapa talangka sensaksama kazüogo, ta ashi.

Bomb pokshiba ajanga Nasheed indang tar aser temesen raksatsü aser pa indang tesaret ka dena raksatsü, ajisüaka centimeter (0.4 inches) ka tera majung agi pa temulungjang nung mekongshi, ta mozüi ketdangsür kati ashi.

## Australia arrtsü maneni shibanga ayutsü: PM

**Canberra, Monupii/May 9**

**(Agencies):** Australia Ato Kilonser Scott Morrison-i Deobarnü sangdong ka ajanga, Australia nungertem Covid-19 tapu tasen balala poktetyonga aoba nungi kümzüka toktsütsü atema linük arrtsü mapa telatet ka makai shibanga atatsü, ta metetdaksüogo. Alima ajunga sünga coronavirus prokshia ao tenzüka sülen taoba küm March ita Australia arrtsü shibang. Lisopurtem aser Australia nung teti alirtem dang linüki aitsü melar.

April 27 nü Australia-i India nungi indang indang aruba tayimtsütem May 15 nü tashi marudaktsütsü atema tenokdangba agütsüogo. Media osang balala ajanga, Morrison-i, tangsa tangbo alima linüktem atema Australia lapoktsütsü kecha tejangraba mali aser maneni kümdangshia alitsü, ta ashiba metetdaksü. Paisa, vaccine agiba maparen tembangba sülena arrtsü lapoktsütsü atema kümzüka ali mali aji mejangja aser "zero cases" target toktsütsü atema pa sentong kecha mali ta ashi. Morrison-i ashiba agi, linük arrtsü mapang telatet ka makai shibanga ayutsü, ajita asünungdang Australia nungertem Covid-19 tapu tasen balala prokshia aoba nungi kümzüka toktsütetsü.

Finance Minister Simon Birmingham-i Brehostibarnü, international arrtsü tangsa tangbo melapoktsü, kechiyong Australia nungertem Covid tanaben linüki maitshidaktsüner, ta ashiba sülen PM-i iba osang lemsatepogo. Australia nung tang tashi nung nisung 29,906 dak coronavirus tashidak potetogo aser nisung 910 süogo.

Tang tashi nung Australia nunger million 2.5 nem coronavirus vaccine agütsüogo, ta Federal Government sangdong ka ajanga metetdaksü. Ajisüaka maparen kanga meyilongi aoba atema sorkar nungi taitsüba ajangshio, shirnoki March ita tatemibo nisung tain million pezü nem vaccine agütsütsü nükjidong yur liasü.

May 7 nü Morrison-i, May 15 aser May 31 nü India nungi lisopurtem anir arutsü atema repatriation flights asem achaayangtsütsü ta shio. Mezüngbuba tayimtsü May 15 nü Darwin tonga arutsü. India nungi tayimtsü tang tashi marudaktsüi lir.





## India nung 'Amazon Prime Day Sale' thitemer



**New Delhi, Monupii/May 09, 2021 (Agencies):** Amazon India-i kum nung khen agiba Prime Day sale sentong anenja atar, ta company otongdar sangdong ka ajanga metetdaksü.

India nung Covid-19 wara tanaben adoka tensa mejungi akumba ajanga iba sentong magitsü lemtet. Linük nung nisung million 1.5 dak iba tashidak tasen puteta lir aser shirangertem anepalutsü asoshi yipden den medical oxygen peria maliba ajanga

tetsükdaksü jenti adokdar.

Alima nung nütsung yongsük timtiba aliba linük rongnung tanabuba - India nung Covid-19 anema raraba maparen pusema Amazon, Google aser tanga India indang firm aikati medical osettsüset aser medical oxygen yanglutsü asoshi senotsü agütsütsü nangzükogo.

India nung Amazon indang Prime Day sentong anentsü asoshi Hokolbarnü CNBC ajanga mezüing osang agütsü.

Iba sentong ya tongtibangsa Amazon ajanga züingsemtem atema offer balala agütsür aser sale timba akümtsü asoshi July ita agir.

Amazon sabang nung subscriber temi timba lijaliyongtsü asoshi discount agütsüba ya Amazon markets Prime asalentong ka alitsü. India den külemi Amazon-i Canada nunga Amazon Prime Day sale thitsüogo. Amazon Prime Day Sale thitsüba ya Amazon-i osang jangjatsüogo aser linük ana nung Prime Day sale tenzükshitsü atema company ajanga osang tejangja ka magütsü.

Amazon Prime Day Sale ya tanabenbuba atonga thitsür alitsü. Taoba kum alima ajunga asungba coronavirus tenokdangba ajanga October ita Amazon-i Prime Day sale anenja liasü.

## Pelaba Lemsateper

**Asür Toshimenla Kichular,** W/o. Late Bendangwati Imchen Temeimtiba ojala asür Toshimenla Kichular, lai iba akümüli toktsür orr onok mangyim jashi tia ajuruba mapang shirnokisa ozü dang temeim mapa ajanga nungita yariogo nenok ajak dang kinungertemi kanga pelaba lemsateper.

Nenoki ozü atema aria bilemstsüba aser masadantetba temeim sayuba ajanga iba tako marok koktetsüsa onok kija shia mulung süneptsüogo aser temoatsü nguogo.

Nenok mapa tajung asoshi nenok kija shia tenüing teta ozüi pelaba meshiteter, ajisüaka Tulusang Tsüngremi nenok ajak molamushia moajangma ta ozüi sarasademtsür.

**Temeim Jala, Jabaso, Semchirtem, Adianu aser Kinungertem.**



06.11.1951 - 30.04.2021

## Rahul Vohra alima nungi pilaogo



**New Delhi, Monupii/May 09, 2021 (Agencies):** Deobarnü, Delhi kübok mozüki ka nung actor aser YouTuber Rahul Vohra COVID-19 tashidak ajanga süogo, ta theatre director-playwright Arvind Gaur-i osang jangjatsü.

Arishi kum 35 tain Vohra-i taoba hopta tetenzüklen Facebook sabang ajanga pa dak Covid-19 tashidak putetba osang lemsatepa liasü.

Tahirpur kübok mozüki ka nung pa anepalua liasü aser pa temang mejungi aoba ajanga Honibar nikongdang Dwarka kübok Ayushman Hospital-i anir ao.

Gaur-i Vohra asüba osang ya Facebook ajanga lemsatep.

"Rahul Vohra iba akümüli nungi pilaogo, ni kanga dang sapuba actor tajung ka süogo. Pa shirangba mapang, junga

dang anepalubo kü taküm kumzükter lila ta yashi pai kü dang ashi. Yashi nikongdang pa Ayushman, Dwarka-i anir ao saka onoki pa taküm mekümzükter. Onoki nü matsündang aibelenogo, imlibilema onok dang taidokangma," ta Gaur-i lemsatep.

Honibarnü, Vohra-i Facebook post nung Ato Kilonser Narendra Modi aser Delhi Deputy Chief Minister Manish Sisodia naprongla tenüing tetshia iba wara atema treatment tajungba agütsütsü asoshi mepishia liasü.

"Tajungba dang anepalu asübo, iba wara nungi ni kumzükter lila. (Mujhe bhi accha treatment mil jaata to mai bhi bach jaata tumhara)," ta Vohra masüidang pai Facebook nung lemsatep.

## 'Mortal Kombat' sequel yangludaktsüner: Jessica



ishika yanglura kanga pelatsü ta lemsatep.

Director Simon McQuoid indang tanaben yanglushiba film nung arishi kum 34 tain Australia tsür actress Jessica-i Sonya Blade shilem agiogo. Iba franchise ya 1992 kum adokba video game nung ajemdaker yangluba film ka alitsü.

**Mortal Kombat 2021 film tangokba mapang, sequel yanglutsü**

**New York, Monupii/May 09, 2021 (Agencies):** Jessica McNamee-i la indang film tasen - 'Mortal Kombat' nung sequel

asoshi McQuoid-i jembia meliasü, saka tarutsü nung iba film den tatongtep yanglutsü asoshi otsü tarensen asoshi tasa

## Zunheboto nung World... (Tapak 2 nungi...)

...aser parnoki taishitsü tajung sayuba ajanga timtem lendong ajangshiba mapang nungdaka aliba purtem nem lokti-i teyari agütsür aser ibayongji Red Cross Society ya lokti tentet tongtibang ka koba ajaki akhümtsübur aser tushir, ta ashi. Paisa, wara pokteter aliba mapang district branch renemshia alitsü ayongzük. Maneni DC-i, züingsemtem dang nungdaka aliba purtem nem teyari agütsütsü atema teti renema alitsü ajungshi, koba iba lokti nükjidong tongtibangtiba lir.

Sentong omen dak ajemdaker jembiba mapang CMO Zunheboto Dr Akaho Sema-i, India dang wara tasembuba jenjangi ayaoka idar aser iba tetezü mesen ajaklen prokshia lir aser lokti nung tashidak menatepyonga aoba menokdangtetsü aser wara poktetli ama tashidak

menatepba tera bushiyonga aotsü tamakoktsü kumogo, ibayongji linük nung anogoshia nisung lakh 4 tema dak tashidak poteter aser nisung 3500 shi asü ta ashi.

Paisa, lokti nung telok kari mask asema, teka metsükba yimya, sanitizing amshiba aser vaccine agiba anema nokdakba atema sasaa bilemba lemsatep. Paisa, wara den hai haura akaba ajanga lendong tulu ataloktsü ana nung aliba tekümdangtsü metetdaksü.

Sentong nung Advisor IRCS, Dr Huskha Yephthomi-i, Red Cross Society tentetba indang lemsatep. Maneni tepela anküp o jembiba mapang taoba V/chairman Hokugha Sükhali-i, IRCS, Zunheboto dang atsüngdaker melei takokba tashi shilem agitsü ajungshi. Iba sentong ya V/chairman Kashito Yephthomi lenisüba nung agia liasü.

Cape Town, Monupii/May 09, 2021: India indang stunt reality television series - 'Khatron Ke Khiladi 11' metangokdang, Honibarnü actor Arjun Bijlani-i Cape Town nung Rahul Vaidya, Sana Makbul, Nikki Tamboli aser Aastha Gill nung den külemi tangokba noksa ka Instagram ajanga lemsatepba yangi angur. Iba TV series maparen metenzükdang Khatron Ke Khiladi 11 nung shilem agitsüpur temi Cape Town nung tesem balala sema senzüogo. Ano külen shilem agirtemi parnok Mumbai nungi Cape Town tashi külemi aruba noksa tem lemsatepa liasü. Khatron Ke Khiladi 11 season nung Arjun Bijlani, Rahul Vaidya, Nikki Tamboli, Sana Makbul, Aastha Gill, Divyanka Tripathi, Abhinav Shukla, Varun Sood, Vishal Aditya Singh, Sourabh Raj Jain, Anushka Sen, Mahekk Chahal aser Shweta Tripathi nung dena lir.





## Aryna Sabalenka-i Madrid Open kokogo



**Monupii/May 9, 2021 (Agencies):** Aryna Sabalenka tetsü yirur aliba ajanga hopta ana tejakdang Madrid Open nung shilem magitsü atema tera agi telemtetba magiba sülen lai Honibarnü iba asayamung tetsür kija asaya kokogo.

Final asaya nung Sabalenka-i, temaba jenjang nung aliba asayar Ash Barty 6-0, 3-6, 6-4 agi koka 10buba WTA title aser clay court nung

asayaba mezüngbuba asayamung kokogo.

Hopta ana tejakdang Stuttgart final nung Barty makokba sülen Sabalenka-i tang iba asayamung kokogo aser la taruba hopta sayaba world ranking nung jenjang 4bubai atutsü.

"Stuttgart nung final asayaba mapang ni yiru aser marakzüteti liasü, anungji ni iba asayamung nung shilem maginüi liasü," ta lai ashi.

"kechi koda asüar ni mejangja saka ni kanga kara taneptsü angu. Parnoki ni anogo pezü tsüngda tajungba kümdaktsü aser kodakinarkaser ni tanü takoker ka ama nokdaka lir," ta laisa ashi.

Germany nung Barty den asayaba mapang Sabalenka adductor muscle yirua liasü.

Sabalenka asoshi iba takok ya taküm küm takok tanabuba lir. Lai Abu Dhabi nung season nung mezüngbuba asayamung koka liasü. Kasa mapang nung la Miami nunga quarter final nung Barty-i tsükdaktsü.

Kasa asayamung tebur semifinal asaya nung Zverev-i Dominic Thiem koka Madrid Open final tongogo. Final nung pa Berrettini den asayatsü shibai Casper Ruud 6-4, 6-4 agi koka liasü.

No. 6 asayar Zverev-i semifinal nung No. 4 asayar Thiem 6-3, 6-4 agi koka final tongtetogo.

Tetsür tarep final asaya nung Czech Republic tsür Barbora Krejčíková aser Katerina Siniakova nati 6-4, 6-3 agi Canada tsür Gabriela Dabrowski aser France tsür Demi Schuurs na kokogo.

## Mohun Bagan nungi asayar Das & Sahil dak COVID-19 potet

**Monupii/May 9, 2021 (Agencies):** ATK Mohun Bagan nungi asayar Prabir Das aser SK Sahil na dak COVID-19 tashidak potetogo. Par team AFC Cup group stage nung tokteptsü atema Maldives-i mao tsüngda tena dak tashidak poteta liasü.

May 14 nü nungi tenzüka Maldives yimtiba, Male nung Group D asaya nung shilem agitsü atema mao tsüngda May 7 nü Kolkata nung private

mozüki ka nung team nung züngsemtem ajak COVID-19 tashidak tendangba sülen tena dak tashidak keta aliba osang aru.

AFC inyakim kübok tetoktepba nung shilem agitsü aliba asayatem ajaki pei linük toktsür mao tsüngda anogo ana jelia tashidak tendangba COVID-19 negative reports sayutsüla ta shia lir. ATKMB pur Hombarnü Maldives-i aotsü liasü. "Auh Prabir Das aser Sahil na dak COVID-19

tashidak potetogo aser tena team nung mezüngoksem. Tanungba asayar aser staff tem ka dak danga tashidak mepotet," ta ATKMB team source kati metetdaktsü.

Ajisüaka ATKMB pur tia kaa, inyakim nung tetsükdaktsü kar adokba ajanga AFC Cup (South) Group D asayatem ajak thinena ataba Asian Football Confederation (AFC)-i metetdaktsüogo.

## AFC Cup Group D asaya ajak thinener

**Monupii/May 9, 2021 (Agencies):** Asian Football Confederation-i sangdong ka ajanga, AFC Cup Group D asaya ajak mapang telatet ka makai thinena ataba metetdaktsüogo. Bengaluru FC dak sendakba tatalokba ka Honibarnü temai adokba sülen iba osang metetdaktsü.

Board-i, iba asayamung nung shilem agitsü aliba club ajak dang pei kidangi meyipa aotsü tetuyuba agütsüba den Covid-19 inyakim ajak sülen tashi angaa anidaktsü metetdaktsüogo. "AFC Cup (South) Group D asayatem thinena ataba Asian Football Confederation (AFC)-i jangjashitsür, koba May 14 nungi 21, 2021 tashi Male, Maldives nung asayatsü renemer liasü," ta AFC sangdong ka ajanga

metetdaktsü.

"Club tem shirnoksa Maldives tonga or lir, parnoki parnok sasa anepalua pei kidangi meyipa aotsüla aser linük nung benoka aliba COVID-19 health aser senzügenpong dak sendakba nung tetuyuba agütsür aliba sülen tashi angaa anidaktsüla. Kasa mapang nung club aser ketdangsür shirnok Maldives-i mao lir, parnok dang AFC-i parnok sentong athitsü atema osang agütsüogo," ta kasa sangdong ajanga metetdaktsü.

Football Association of Maldives (FAM)-i, AFC dang, India indang club Bengaluru FC aser Maldives indang Club Eagles na asaya athitsü aser group stage nung asayatem thinentsü atema mepeshia asüngdangba sülen iba telemtetba agia liasü.

## PCB-i thinener aliba PSL UAE nung ayongzüka asayatsü akok

**Karachi, Monupii/May 9 (Agencies):** Pakistan Super League 6 nung tanungba asayatem taruba ita UAE nung asayatsü atema Pakistan Cricket Board (PCB)-i Emirates Cricket Board den sensaksem tenzüko. PSL nung asayaba Club nung asayatem dak covid tashidak potetba sülen March 4 nü PSL thinena liasü.

PCB ketdangsür kati, tanungba asayatem Dubai aser Abu Dhabi nung asayatsü atema ECB den sensak asema jangjatsüogo.

"Maparen tang inyaktepdar, ajisüaka tongtubangtibaji ECB-i mapang tepetdak süaka PSL nung asayatem ayongzüka asayateptsü temulung lema bilemba lemsatepogo," ta pai ashi.

Ketdangsürisa, PCB-i tanungba asayatem June 1 nü nungi Karachi nung asayanüa liasü, saka National Command aser Operations Centre, kobai Covid-19 dak sendakba ken o ajak achayanger, iba telok yagi Eid Holidays sülen June ita tashidak tali menatepyonga aotsü akok ta bilemer.

NCCC-i, tanga tesem kar nung PSL asayatsü atema PCB ajungshiba sülen iba telemtetba agi.

PCB ketdangsüri ashiba agi, ken o kaji UAE nung asayamung ayongzüka asayaba ajanga bandanger asayar aser board tem nem Pakistan nung asayatsüba indang osang tai ka agütsütsü akok. "Timtem tekangshi aika ajanger Pakistan nung tanaben International cricket asaya tenzüko, anungji onoki iba

yaa süoki ia agir, kechiyong temaba jenjang nung asayaba England aser New Zealand team küm tatemi Pakistan nung arua asayatsü lir," ta pai ashi.

PCB-i, ECB den senotsü tsütsü sensak asemtsü kechiyong ground taa, hotel jenjang ajungketer aliba aser senzügenpong taa ajak agütsütsüsa akümtsü, ta ketdangsüri ashi.


Kasa mapang nung taoba board mendenbuba Najam Sethi, shiba 2016 küm PSL amenok, pai Pakistan nung Covid-19 tensa apir bendanger asayartemi masayanütsü akok, ta ashi.

"PSL asayatem taoba mapang renemer aliba ama [June 1-17] ayongzüka asayatsü atema National Command and Operation Centre (NCO) nungi temelaba agitsü atema PCB atema tasak masütsü.

"Ajisüaka bendanger asayartem Pakistan semdangtsü renema mali, kechiyong Pakistan ya linük aika nung Covid-19 wara pokteter aliba ajanga red list nung züngoksema lir," ta Sethi Dwan osang kakat dang ashi.

PCB aser club trokprongla Hokolbarnü virtual senden ka menogo aser Dubai nung asayatsü ajaki mulunger, ajisüaka Sethi-i, PCB-i league tasayadak nung March 4 nü asayamung anendaktsüba ya aibelen tuluka ta ashi. "Tanungba asaya 20 ya terpranger medeni bio-secure bubble ka nung asayatepeter lila," ta pai ashi.

## Mandeep Jangra-i mezüngbuba Pro Bout akok



**Monupii/May 9, 2021 (Agencies):** Commonwealth Games nung silver medal ngur alisang India nung boxer Mandeep Jangra-i, professional circuit nung mezüngbuba asaya nung Argentina nung asayar Luciano Ramos kokogo. Iba

asaya Florida, USA nung asayaa liasü. Jangra training agitsü atema ita ana tejakdang USA-i ao.

Mandeep-i Honibarnü super welterweight category nung mezüngbuba professional bout nung Ramos den

round pezü asayaba sülen unanimous decision agi asaya akok. Jangra-i Florida nung amenoker aliba Pro Box Promotions den tenangzüktepba ka yanglur lir.

Arishi küm 27 tain asayar, shibai 2013 Asian Championships nung silver medal nguogo, pa March 19 nü asayatsü liasü saka iba asaya thinen. "Pro ranks nung asaya kanga junga tenzüka atema ni kanga pelar aser kü team den world championship ka akoktsü imlaa atar," ta Mandeep-i ashi, shiba America nung coach Asa Beard aser Marc Farrait den training agidar.

### BILEMDANGANG

"Tamang makatetba ajanga tamakok ajangshir."